

## Bonena Anne Kittaka

---

### Nipa'jarina sikontu apa-apaya

**1** Uru-uruna, ri wattu Napa'jarina Allata'ala sikontu apa-apaya, <sup>2</sup> tenapa panrala'na buttaya, siagang tenapa apa-apa silolongang. Sikontu apa-apaya nitongkoki ri tamparang luar'a siagang lompoa bombanna, nani-aki sassang makkapuka. Mingka niaki koasa malompoNa Allata'ala a'gio' irate ri tempo'na je'neka. <sup>3</sup> Nakanamo Allata'ala, "A'jariko singaraka!" Nampa nia'mo singaraka. <sup>4</sup> Sannammi nyawaNa Allata'ala anciniki anjo passalaka. Na Nasa'la'mo singaraka battu ri sassanga, <sup>5</sup> nampa Naareng anjo singaraka "Singara'" na anjo sassanga "Bangngi". Allalomi bangngia, battumi bari'basaka. Iaminjo allo makase'rea.

<sup>6-7</sup> Nampa Nakanamo Allata'ala, "A'-jariko se're pannahang untu' ansa'laki anjo je'neka a'jari ruang pammantanggang, siagang nanatahang lalang ri tampa'tassa'laka." Nakajariammo anjo passalaka. Kammaminjo Napare'na Allata'ala pannahang ampasisa'lakai je'ne' niaka irawanganna anjo pannahanga siagang niaka irateanganna. <sup>8</sup> Naaremni anjo pannahanga "Langi'". Allalomi bangngia nabattumo bari'basaka. Iaminjo allo makaruaya.

<sup>9</sup> Nampa Nakana Allata'ala, "Kuerokangi na'lo'loro' je'ne' niaka irawanganna langika mange ri se'reang tampa', sollanna kacnikang buttaya." Nakajariammo anjo passalaka. <sup>10</sup> Naaremni Allata'ala anjo buttaya "Bonto", naanjo je'ne' asse'rea "Tamparang". Nasannammo nyawaNa Allata'ala anciniki anjo passalaka. <sup>11</sup> Nakanamo pole Allata'ala, "Kuerokangi anjo buttaya appatimboi sangka' rupa pok'o'-poko', iamintu appa'niaka wassele' rappo-rappoang a'lisereka siagang rappo-rappoang maraengannaya." Kajariammo anjo passalaka. <sup>12</sup> Kammaminjo nappatimbomo buttaya sangka' rupa pok'o'-poko'. Nasannammo nyawaNa Allata'ala anciniki anjo passalaka. <sup>13</sup> Allalomi bangngia nabattumo bari'-basaka. Iaminjo allo makatallua.

<sup>14-15</sup> Nampa Nakana Allata'ala, "Kuerokangi nia' apa-apa singara' ri langika untu' ansingari buttaya, untu' ampasisa'laki singaraka siagang bangngia, siagang untu' ampa'nassai wattu pakaramulana aloa, taunga, siagang allo lompona agamaya." Nakajariammo anjo passalaka. <sup>16</sup> Kammaminjo Napa'jarina Allata'ala ruaya apa assare a singara' lombo, iamintu mataallo untu' koasa ri singaraka, siagang bulang untu' koasa ri bangngia; pantara-

nganna anjo Napare' tommi sikamma bintoenga.<sup>17</sup> Naboli'mi Allata'ala anjo barang-barang singaraka ri langi' untu' ansingari buttaya,<sup>18</sup> untu' koasa ri singaraka siagang ri bangngia, siagang untu' ansa'laki singaraka battu ri sassanga. Na sannammo nyawaNa Allata'ala anciniki anjo passalaka.<sup>19</sup> Allalomi bangngia nabattumo bari'-basaka. Iaminjo allo makaappaka.

<sup>20</sup> Nampa Nakana Allata'ala, "Kuerokangi nia' apa-apa attallasa' a'lange-lange lalang ri je'neka, siagang jai jangang-jangang anri'ba' rate ri allaka."<sup>21</sup> Na Napa'jarimo Allata'ala olo'-olo' lompoa lalang ri tamparanga siagang sikamma apa-apa attallasaka ilalang je'ne', kammayatomba sangka' rupaya jangang-jangang. Nasanammo nyawaNa Allata'ala anciniki anjo passalaka.<sup>22</sup> Yangasenna anjo sikammaya Nabarakkakimi Allata'ala. Siagang Nasaremi parenta sikamma olo'-olo' attallasaka lalang je'ne' sollanna a'bija-bija siagang napirassi tamparanga, kammayatomba jangang-janganga sollanna pila' katambang.<sup>23</sup> Allalomi bangngia nabattumo bari'-basaka. Iaminjo allo makalimaya.

<sup>24</sup> Nampa Nakana Allata'ala, "Kuerokangi nia' ri buttaya sangka' rupa olo'-olo' ri bontoa, ia annabaya siagang liaraka, ia lompoa siagang ca'dia."<sup>25</sup> Nakajariammo anjo passalaka.<sup>26</sup> Kammaminjo Napare'na Allata'ala sikontu anjo apa-apa niaka siagang sannammi nyawaNa ancini' ngasengi anjo passalaka.

<sup>26</sup> Nampa Nakana Allata'ala, "Kamma-kamma anne lapparekKi' tau lasanrapanga iKatte siagang lasantnjaka iKatte. Lakoasai ke'nanga mae ri sikamma juku'-jukuka, jangang-janganga, siagang sikontu olo'-olo' maraengannaya, kammaya olo'-olo' annabaya siagang liaraka, kammaya

lompoa siagang ca'dia."<sup>27</sup> Kamma-minjo bateNa Allata'ala ampa'jari rupataua, na Napa'jari ke'nanga sanrapang KalenNa. Napa'jarimi ke'nanga bura'ne siagang baine.<sup>28</sup> Nampa Nabarakkaki ke'nanga angkana, "Ammana'-mana' mako siagang accucucu mako nu'jari jai, sollanna napammantangngi sossorannu sikontu buttaya siagang nanakoasai. Kusareko tugasa' untu' amparakai sikamma juku'-jukuka, jangang-janganga, siagang sikontu olo'-olo' maraenganga ia liaraka.<sup>29</sup> Kusareangko sikontu pok'o'-poko' kayu a'lisereka raponna siagang rappo-rappoang maraenganga untu' a'jari kanrenu.<sup>30</sup> Mingka sikontu jangang-janganga siagang olo'-olo' liara' maraengannaya, Kusareangi ruku' siagang lamungang leko'-lekoka a'jari kanrena."<sup>31</sup> Nakajariammo anjo passalaka.<sup>32</sup> Naciniki ngasemmi Allata'ala sikontu anjo apa le'baka Napa'jari, siagang sannang sikalimi nyawaNa. Allalomi bangngia siagang battumi bari'basaka. Iaminjo allo makaannanga.

**2** Nale'ba'mo nipa'jari sikontu apa-apaya.<sup>2</sup> Ri allo makatujua nale'ba'mo Napa'jari Allata'ala anjo jama-jamanNa, nampa ammari-marimo.<sup>3</sup> Nampa Nabarakkakimo anjo allo makatujua siagang Nasa'la'mi a'jari allo pamari-mariang, lanri iaminjo alloa Nammar-mari Allata'ala ri wattu le'ba'namo Napa'jari jama-jamanNa.<sup>4</sup> Kammaminjo riwaya' nipa'jarina sikontu apa-apaya.

### Koko Eden

Ri wattu Napa'jarina Karaeng Allata'ala sikontu apa-apaya,<sup>5</sup> tenapa bine attimbo siagang tenapa lamung-lamungang ri buttaya, lanri tenapa Napaturungi Batara bosia siagang tenapa tau lanjamai anjo buttaya.<sup>6</sup> Mingka appakaramulami je'neka as-

sulu' battu ri buttaya nanabasai tempo'na buttaya.

<sup>7</sup> Nampa angngalle Karaeng Allata'ala sike'de' butta, naNapare' a'jari se're tau, nampa natui' so'olo' ka'-murunna siagang nappasa' assarea katallassang; nattallasa'mo anjo taua.

<sup>8</sup> Le'baki anjo appare'mi Allata'ala koko ri Eden, irayanganna anjo tam-paka, nampa Napamantang anjoreng anjo tau le'baka Napare'. <sup>9</sup> Napatimbomi Karaeng Allata'ala sangka' rupa pok'o'-poko' ga'ga, bajika raponna. Ri tangnga-tangngana anjo kokoa nia'-mo attimbo pok'o' assarea katallassang, siagang pok'o' assarea pangngasse-ngang ri passala'na bajika siagang kodia.

<sup>10</sup> Nia' se're binanga a'lo'loro' bat-tu ri Eden, ambasai anjo kokoa; na pantaranganna anjo koko Eden ta'ba-ge appaki anjo binangaya. <sup>11</sup> Makase'rea niarengi Pison; iaminne binanga-ya a'lo'loro' ri tammulilina butta Hawila. <sup>12</sup> Anjoreng nia' bulaeng ti'-no' kammayatomba bau'-baukang su-saya nigappa, siagang batu-batu para-mata. <sup>13</sup> Binanga makaruaya niarengi Gihon; a'lo'loroki je'ne'na ri tammu-lilina butta Kus. <sup>14</sup> Binanga makatal-lua niarengi Tigris, a'lo'loroka iraya-nganna pa'rasangang Asyur. Binanga makaappaka niarengi Efrat.

<sup>15</sup> Nampa Napamantang Karaeng Allata'ala anjo taua lalang ri koko Eden, sollanna najama siagang napar-kai anjo kokoa. <sup>16</sup> Nakanamo Batara mae ri anjo taua, "Akkullei nukanre sikontu raponna anjo pok'o'-poko' ni-aka ri anne kokoa, <sup>17</sup> pantaranganna anjo pok'o' assarea pangngassengang ri passala'na bajika siagang kodia. Tak-kulleai nukanre raponna anjo pok'o' kayua; napunna nukanrei tena tamate-nu ia memang anjo allo nukanrena."

<sup>18</sup> Nampa Nakana Karaeng Allata'ala, "Tabajikai taua attallasa' kale-

kalenna. LappareKa' se're parekang aganna ia cocoka ri ia untu' amban-tui." <sup>19</sup> Angngalle tomni sike'de' but-ta nampa Napare' sangka' rupa olo'-olo' niaka ri bontoa siagang niaka ri alla'. Na Naerang ngasemmo Allata'-ala anjo sikammaya mae ri anjo taua sollanna nacini' angkanaya areng apa lanasareangi anjo sikamma olo'-olo-ka. Iaminjo assala'na olo'-olo' niaka ri tempo'na buttaya siagang olo'-olo' niaka ri alla', namassing nisare areng. <sup>20</sup> Kammaminjo nanasaremo areng taua anjo sikontu olo'-olo' niaka ri tempo'-na buttaya siagang ri allaka. Mingka tena manna se're kalase'renna yang-a-senna anjo akkulle a'jari agang cocoka mae ri ia siagang akkullea ambantui.

<sup>21</sup> Nampa Napa'jari attinromo Ka-raeng Allata'ala anjo taua. Nalalang attinrona, Napasulu'mi Karaeng Al-lata'ala kalase'renna buku rusu'na battu ri kalenna anjo taua, nampa natongko' ammontere' siagang dageng anjo bate pammantanganna buku ru-su'na. <sup>22</sup> Battu ri iaminjo buku rusuka naNapare' Batara sitau baine, nampa Naerang mae ri anjo taua. <sup>23</sup> Nakana-mo anjo taua,

"Iaminne tau sangkammangku, buku battu ri bukungku, siagang dageng battu ri dagengku.

Kuarengi baine, lanri battu ri bura'nei nialle."

<sup>24</sup> Iaminjo saba'na nanabokoi bura'nea anrong manggena, nampa a'jari se're siagang bainenna, na'jari se'remo anjo ruaya tau.

<sup>25</sup> Assolaraki anjo bura'nea siagang bainea, mingka tena nasiri'-siri' naka-sia'.

### Angngewai rupataua ri Allata'ala

**3** Ia ularaka iami kaminang cara'de' ri sikontu olo'-olo' Napareka Karaeng Allata'ala. Akkuta'nangi anjo

ularaka mae ri anjo bainea angkana, "Apaka ma'nassa tena tojeng Nakel-laiko Allata'ala angkanrei anne sikon-tu rappo-rappo niaka ri kokoa?"

<sup>2</sup> Appialimi anjo bainea angkana, "Akkullei nakanre ikambe sikamma rappo-rappo niaka ilalang ri anne ko-koa, <sup>3</sup> pantaranganna pok'o' niaka ri tangnga-tangngana kokoa. TaNapa'-biangai Allata'ala ikambe angkanrei rapponna anjo pokoka yareka anse-roi; punna nakanrei yareka nagauka-nghi ikambe anjo Napappisangkanga, lamatei ikambe."

<sup>4</sup> Appialimi anjo ularaka angkana, "Takammayai anjo; tena nulamate.

<sup>5</sup> Nakkana kamma anjo Allata'ala lan-ri Naassenna angkanaya punna nu-kanre anjo rappo kayua, latassungkei akkala'nu; la'jariko sangkamma Alla-ta'ala siagang lanuassengi apa kodia siagang bajika."

<sup>6</sup> Naciniki anjo bainea angkanaya antekamma ga'gana anjo pok'o' ka-yua, siagang nyamangi nikanre rapponna. Na napikkiriki angkanaya teai sipato' baji'na punna a'jari bajiki pangngassenganna. Jari naallemi rapponna anjo pok'o' kayua, nampa nakanre. Nampa nasare todong bura'-nenna, na nakanre todong bura'nenna. <sup>7</sup> Silalonna memang le'ba'na na-kanre anjo rappo kayua, tassungkemi akkala'na ke'nanga siagang naassem-mi kalenna ke'nanga assolara'. Jari nakalimbukimi kalenna ke'nanga sia-gang leko' kayu naanyanga ke'nanga.

<sup>8</sup> Anjo karuenga nalangngere'mi ke'nanga nia' Karaeng Allata'ala a'-jappa lalang ri kokoa. Jari accokkomi ke'nanga ri alla'na pok'o'-poko' kayua sollanna tanicinika ri Batara. <sup>9</sup> Ming-ka akkio'mi Karaeng Allata'ala ri an-jo bura'nea angkana, "Kemaeko?"

<sup>10</sup> Appialimi anjo bura'nea angka-na, "KulangngerekKi' nia' ri kokoa.

Mallaka' nakuaccokko lanri assola-rakka'."

<sup>11</sup> Akkuta'nammi Allata'ala angka-na, "Inai angkana ri kau angkana assolarakko? Apaka nukanrei anjo rappo kayu Kupappisangkanga angka-na teako kanrei?"

<sup>12</sup> Appialimi anjo bura'nea angka-na, "Anjo baine Kipassareanga ang-ngaganga' ansarea' anjo rappoa, sa'-genna kukanre."

<sup>13</sup> Akkuta'nammi Karaeng Allata'a-la ri anjo bainea angkana, "Angngapa nugaukangi anjo kammaya?"

Appialimi angkana, "Nitipua' ri ula-raka, sa'genna kukanre anjo rappoa."

### Hukkungang Napattantua Allata'ala

<sup>14</sup> Le'baki anjo Nakanamo Karaeng Allata'ala mae ri ularaka, "Lanihuk-kungko lanri anjo panggaukannu. Battu ri sikontua olo'-olo' ikauji ba-wang musti antanggongi anne hukku-nganga, iamintu: Appakkaramula ri kamma-kammaya anne lassosorokko siagang battannu a'jappa, siagang langnganreko limbu'bu lalang sikontu tallasa'nu. <sup>15</sup> Lasikabirisiko siagang anne bainea. Sosorannu siagang sos-soranna latuli simusui. Laniancuruki ulunnu ri sosoranna, nalanukokko' kacunu'na ke'nanga."

<sup>16</sup> Nampa Nakana Batara mae ri anjo bainea, "LaKutambai pa'risi'nu ilalang attianannu siagang ri wattunnu ammana'. Mingka manna nakamma, latuli lompo cinnako mae ri bura'nenu, siagang latuli amminawang turuk-ko ri ia."

<sup>17</sup> Nampa Nakana Karaeng Allata'-ala mae ri anjo bura'nea, "Nupilang-neri kana-kananna bainennu nampa nukanre anjo rappo kayu le'baka Ku-pappisangkang angkana teako kanrei. Lanri anjo panggaukannu, nitunraimi

buttaya. Musti anjama terasakko lang sikontu tallasa'nu nanampaakkulle assare wassele' ganna' anne buttaya untu' kanrenu.<sup>18</sup> Romang-romang siagang ruku'-ruku' akkatinting lanapatimboangko anne buttaya, siagang lamung-lamung tanilamung la'-jari kanrenu.<sup>19</sup> Laballasakko anjama siagang lammattiki songo'nu nanampa nia' wassele'na anne buttaya, sa'gen-nu ammontere' poleang a'jari butta, nasaba' battu ri buttayako nipare'. Battu ri buttayako nipare', na nulam-motere' a'jari butta."

<sup>20</sup> Naarengi Adam anjo bainenna Hawa, lanri anjo bainea a'jari anron-na sikontu rupataua.<sup>21</sup> Jari appare'mi Karaeng Allata'ala pakeang battu ri kukkulu' olo'-olo' untu' a'jari pake-anna Adam siagang bainenna. Nampa Napipakeimo ke'nanga.

### **Nibongkai Adam siagang Hawa battu ri koko Eden**

<sup>22</sup> Nakanamo Karaeng Allata'ala, "Kamma-kamma anne a'jarimi rupataua sangkamma iKatte siagang naassemmi ke'nanga passala' nikanaya baj'i siagang kodi. Jari parallui njagai sollanna tena nakanrei raponna anjo pok'o kayu assarea katallassang, sollanna tena nakkulle attallasa' sa'-genna satunggu-tungguna."<sup>23</sup> Jari Nabongkami Karaeng Allata'ala anjotaua battu ri koko Eden na Nasuro angngusaha butta a'jaria assala'na.<sup>24</sup> Nampa irayanganna anjo kokoa, ri dallekanna pakke'bu antamaya, nia'-mo sipa'rappungang malaeka' pajaga, siagang nia'mo se're pa'dang a'rinraya pepe'na, amminroa ri kere-kere-mae, anjagai agang mangea ri anjo pok'o assarea katallassang. Jari tenamo manna sitau akkulle antama' siagang a'reppese' anjoreng ri anjo pokoka.

**KITTA' MATANGKASA'**  
**lalang bicara Mangkasara'**  
**LEMBAGA ALKITAB INDONESIA**  
**JAKARTA 1999**